

Basler Zepf Ziri  
1951

Mutze-Bebbi Bärn  
1978



# Alti Zepf!

## Zopf-Zyt

Nooch em barogge Buuder-Kopf  
draage Basler Biirger Zopf.  
Ab 1750 (oder so),  
bis dr Napoleon isch koo  
und au d Soldaate-Zepf mien goo.  
Sythäär gilt als "alte Zopf"  
ebbis, wo kai Mentsch me wott.  
Numme: Wel eppis us dr Moode kunnt,  
haisst daas no lang nit: Es isch Schund.  
Drum lauffe miir als Basler Zepf  
und eeren alti Ziri-Kepf:  
Fir 75 Joor langi Hoor!

## YYCH

Spiegel, Spiegel an dr Wand,  
was yych doo see, das isch e Schand!  
Runzle, Dräanesegg, e Ranze,  
die eewig Juuged: Wägg! Im Ganze!  
Bii Schnee vo gescht, en alte Sagg,  
en alte Huet. Dää Zopf muess ab!  
Us altem Zopf git's Fetzelschnitte;  
ooder als TikTok-post: french toast.

Mit Fettwägg-Spritzli oder -Bille,  
mit Botox, Lifte, Lippe-Fille,  
eewigi Juuged kauf yych mir  
(MAGA-guet usgsee isch zwor dyyr).  
Gwalt isch Macht und Macht isch geil,  
drum suech im Graftrum yych mi Hail.  
Denn alli die, wo hänn,  
nämme, was si wänn.

## ÄÄR

Äär het vyyl alti Zepf abschnitte:  
Wooret, Respäggt, au Umgangssitte.  
Demokratie und Wisseschaft  
hänn's in syy Wältbild nimmi gschafft.  
Eb Kiew, Grönland oder Gaza,  
am liebschte: Tabula rasa!  
Äär, wo zwoor ständig sich trumpiert,  
frisst Russezopf – und triumphiert.  
Denn, wenn däa MAGA-Maischter  
hetzt, scheitle sich die Gaischter.  
Wil d Däänen in Europa ääne  
nit sinn Fään vo dääne Wään  
maint dr Rubio: "Don't make a Gschyys,  
Greenland isch gar nit grien, s isch wyss".

## MIIR

Ganz anderscht miir: In Schwyzer Kepf  
regiere stramm die alte Zepf:  
Was in dr Wält – rächts - sinn d Despoote  
in unsrer "Mitti" sin d Nepoote:  
"Fuule Kompromiss" haisst "Konkordanz",  
"Neutralideet" wird "non-chalence".  
Dass Ignoranz ungsteert regiert,  
wird d SRG no schnäll halbiert,  
denn - doo sinn miir alli ainig –  
uns goot's am Beschten ooni Mainig.  
Sanggtione? Sinn scho hyschtoorisch z myyde.  
Entwiggligshilff? Mues firs Budget llyde.  
Wenn's wäägem Schämme denn nimm goot,  
wird s Schwyzer Gryz scho wiider root.

So mache d Voorbild-Schwyz, die tolli,  
US- und Euro-Zöll: Zem Zolli.  
Zmittsdrin, im Duurm us Gold, d Helvetia,  
Rapunzel-glyych, loggt Prinzen aa  
(pauschal-beschttyrt), au Deggter, Pflääg:  
Dr blondi Zopf wyyst eich dr Wääg!  
Bald glättre Flichtling, jeede Daag,  
und Balkaneese, Schlaag uff Schlaag.  
S git Dichtestress im Baradyys,  
d SVP wietet, fielt sich myys.  
Brezyys bim 10-millionschte Kopf  
schnyydet si ab dä alti Zopf

## SII

Zem Gligg git's die mit roote Zepf,  
wo soorge gäärn fir rooti Kepf,  
wo voll Fraid und Sälbschtverdraue  
verspiilt iiri Wält wänn baue,  
wo fräch sin, wild und wunderbar -  
Obelix und Pippi (jo glaar)!  
Daas sin modäärne alti Zepf,  
widewide wie yych si wett!

## p.s.

Was men abschnyyden und doch bhalte wott?  
E Schyybe Bärner Angge-Zopf!